

秋陰雜記一卷

蛾術堂

陸德明經典釋文列老莊

蕭山沈豫補堂著

老莊之學始于魏晉至六朝大盛予讀南史至隱逸傳于宗敬
文刺史安陸王子敬長史劉寅以下皆贈送之測無所受齋老
子莊子二書自隨于沈道虔曰少仁愛好老易于周續之曰閑
居讀老易于戴仲若曰乃述莊周大旨著逍遙論于褚伯玉曰
山陰白石村多邪病村人告訴求哀歡往村中為講老子又曰
國師道士無過老莊又曰孔老教俗為本又曰道出于華豈非
華風本善耶又曰大乖老莊立言本意于杜京產曰專修黃老
于吳天蓋曰善三禮及老莊于徐伯珍曰好釋氏老莊兼明道

術于沈麟士曰著周易兩繫莊子內篇老子要略于庾彥寶曰
著老子義疏于庾承先曰令講老子于馬樞曰六歲能誦老子
云云唐初承六季餘風以老子配天故猶宗尚元學與六經並
垂說典

任彥昇作王文憲集序體似碑碣行狀

起云公諱儉字仲寶瑯琊臨沂人也歷敘家世譜系逐年次官
階并薨年月日諡法按集序此格尠見藝文類聚載有梁王僧
孺臨海伏府君集序陳劉師知侍中沈府君序集集名冠以府
君遂不妨詳述耶抑彥昇受知于文憲譽言惟恐其不至耶是
不可解矣

守

獨斷守秦制也按左有天子之二守國高在又得罪于王之守
臣守不始於秦特太守則始於秦耳

載歲祀年三代多通稱

堯典以閏月定四時成歲舜典歲二月東巡狩唐虞亦言歲也
惟十有三祀是周亦言祀也知爾雅獨斷唐虞曰載夏曰歲商
曰祀周曰年未必盡然也

風序辨

宋王魯齋栢風序辨曰夫十五國之次序不同之說有二曰周
召邶鄘衛王鄭齊幽秦魏唐陳鄘曹者此夫子未刪詩之前季
札所聽周樂之次序也曰周召邶鄘衛鄘鄭齊魏唐秦陳曹幽
王此鄭康成詩譜之次序也曰周召邶鄘衛王鄭齊魏唐秦鄘

陳曹幽此今詩之次序也程子亦因今說而為序云云謹案三家以外以周召魯邶鄘衛王齊魏唐曹鄘鄭陳秦為次者衛端木賜詩傳也以周召魯邶鄘衛王齊魏唐曹鄘鄭陳秦為次者漢魯人申培詩說也二公俱列魯風而缺魯頌編其次於周召之下而幽皆不與缺幽以足魯以彰後儒魯有頌而無風之謬而以鴟鴞東山狼跋伐柯九罭破斧城楚邶駟泮宮有駟閼宮等篇實之

九州

禹貢九州馬融曰禹平水土置九州舜以冀州之北廣大分置并州燕齊遼遠分燕置幽州分齊為營州於是為十二州孔穎達曰禹登王位還置九州鄭康成曰舜以青州越海分齊為營

又曰舜以冀州南北太遠分衛為并幽以北為幽爾雅九州禹貢有青徐梁而無幽并營夏制也職方有青并幽而無徐梁營周制也爾雅有徐幽營而無青并梁非夏非周故孫炎疑是殷制胡明經禹貢錐指曰殷改青曰營遼東朝鮮皆在營域又曰殷周皆無梁州西南隅之地多棄之域外職方九州漢地理志曰周監於二代而損益之改禹徐梁二州合之於雍青分冀州之地以為幽并按十二州舜持一時之計而九州夏殷周三代所同雖或分裁沿革名號不同而其數則一故孔子告之曰雖百世可知也

四海

爾雅釋地云九夷八狄七戎六蠻謂之四海四海以地言不以水言故繫諸釋地不繫釋水禹貢九州之外即是四海不以海

水之遠近為限劉向說苑云八荒之內有四海四海之內有九州是也按胡君禹貢錐指云東海以外有三韓即冀州所云島夷皮服者也有辰韓弁韓馬韓倭人東鯤人倭與東鯤即揚州所云島夷卉服者也東鯤人後漢謂之大倭王國即今日本西海罽賓西南與烏弋山離接烏弋山離西與犁靬條支接行可百餘日乃至條支國臨西海渡海乃通大秦即犁靬也 范曄言甘其抵條支而歷安息臨西海以望大秦距玉門陽關四萬餘里西海之遠如此南海自揭揚起夷洲亶洲儋耳珠厓今瓊州府漢所置儋耳珠厓南海合浦蒼梧鬱林交趾九真日南九郡及牂柯益州永昌三郡皆在禹貢揚荆梁三州之徼外北海唐書言突厥部北海之北有骨利幹國在海北岸又流鬼國去

京師萬五千里濱于北海是北海視西海較近也然自古無人至其地者按胡君四海圖肅慎國在東北肅慎後漢曰挹婁其北不知其所極正北則有獯鬻周日玁狁秦曰匈奴隋唐曰突厥正西則有析支回鄯善且末等國旄牛徼外蠻夷白狼槃木唐鼓等百餘國自析支以西南數千里皆古氏羌地唐為吐蕃而身毒天竺大夏月氏崑崙等國徼在西南至伊吾盧車師蒲類焉耆龜茲烏孫莎車疏勒捐毒休循大宛康居渠搜回隋曰鑠汗徑在西北矣

先君

人子稱故父為先君如曹大家東征賦先君行止則有作兮注曰先君謂彪也而孔安國書序云先君孔子按孔子為安國十

一代祖毛詩序孔穎達云先君宣父釐正遺文是遠祖皆得稱先君也

紀有大小

俗以十二年為一紀如子鼠丑牛寅虎卯兔辰龍巳蛇午馬未羊申猴酉雞戌犬亥豕自子至亥一週為一紀此小紀也廣雅曰自開闢至獲麟二百七十六萬歲分為十紀則大率一紀二十七萬六千年此大紀也

陸宣公請還田緒所寄撰碑文馬絹狀

祭統衛孔悝之鼎銘章其先祖無美而稱之是誣也田緒之請撰遺愛碑文此不過盡人子之道君復恩旨令撰亦深知宣公不阿權貴特加勅諭而為調停其間見亢直之概可行於僚友不可施於君前顧讀其傳曰謬承恩光備位台輔既未能滌除姦慝裨益大猷而又飾其愧詞以贊凶德納彼重貨以襲貪風情所未安事固難強抑何婉而嚴曲而直也昔承祚作志謂丁儀曰予我斗米為乃翁立佳傳論譏失實振古如茲即昌黎為唐代大儒而劉持愈金數筋去曰此諛墓中人所得耳不若與劉君為壽愈不能止以視此狀其相去為何如也

法言

揚雄法言十三卷象論語首學行終孝至惟五百重黎兩篇立名詭祕故桓譚決其必傳若太元首衝測攤瑩數文掎圖告十一篇解剝離散雖劉歆亦曰空自苦後人用覆醬瓶也况其他乎孔子曰辭達而已矣艱深云乎哉

尚黨皆叶平聲讀

田單攻敵章宗廟亡矣亡日尚矣歸於何黨矣姚氏云三語皆作平聲讀說苑宗廟亡矣魂魄喪矣歸於何黨與似喪亦作如字讀

義窮幾象

文選祭顏光祿文義窮幾象注幾象謂周易按幾似義字之誤
赧王以後應書年以存正統

王應麟云周赧王卒於乙巳明年丙午秦遷西周君而東周君猶存壬子秦遷東周君而周遂不祀作史者當自丙午至壬子係周統於七國之上乃得春秋存陳之義大事記周赧後即繫秦未子以為未當綱目以七國如楚漢並書之近天台齊次風

宗伯作歷代帝王年表自赧王乙巳後亦不繫年止以周末秦六國年表下夾行小字自赧王以乙巳王入秦而周室亡又七年秦滅東周君而周祀絕天下無天子者二十八年共三十四字亦以必書周統於七國之上為是特不自創其例耳

古人世次多不可解

大戴禮帝繫篇顓頊產窮蟬窮蟬產敬康敬康產勾芒勾芒產螭牛螭牛產瞽瞍瞽瞍產重華是為帝舜按顓頊本身至舜凡七世以三十年為一世核之得二百一十年况中古民氣淳泊年壽多高更有不止此數者而下文接云顓頊產鯀鯀產文命是為禹攷之五帝德篇孔子曰高陽之孫鯀之子也曰文命以序而計禹之次與敬康埒舜典伯禹作司空是禹與舜同時年

當一百五十外矣尚能作司空耶卽推之我周組紘以上史記國語昭穆年代俱難憑計豈譜牒脫簡也蓋不可考矣

贈本生父母官

容齋四筆載封贈先世自晉宋以來有之殆唐始備然率不過一代引郭汾陽二十四考中書令而其父贈止太保權德輿位宰相其祖贈止郎中為証然三國魏志王基傳基母卒詔秘其凶問迎基父豹喪合葬洛陽追贈豹北海太守是時基進封東武侯則追所贈自魏已有矣

韓非子刑德與孔聖異

韓子曰明王制其臣下者柄而已矣二者刑德也殺戮之謂刑慶賞之謂德魯論為政篇道之以德則德是整躬率物之具非慶賞也卽刑亦是章程條教非概為殺戮申韓之殘酷不仁甚矣哉

秋蠅冬蝨

秋之蠅冬之蝨至可憎也然滌垢摒羶則蠅不能扇其翼潔已澣衣則蝨不能繁其孽故曰物必先腐也而後蟲生之

馬人

江左吳炯五總志退之云衙時龍戶集上日馬人來云馬人不見于書傳更當詳攷按赤雅馬人奔林邑蠻深目獬鼻散居洞落獻歲一至軍府聽令不與猺獠同居僉曰伏波遺種也

陶靖節閒情賦

蕭統序陶集曰白璧微瑕惟在閒情一賦東坡以為正國風好

色不淫之意笑昭明為小兒強作解事予觀文人託咏原屬寓言如必以綺麗之語指為媒瀆確証則屈宋香草美人亦真冶蕩耶本朝竹垞先生亦以風懷二百韻為士林詬病殆未免為東坡所譏矣

長十八

西河詩話 今上嘗出塞駐蹕烏蘭布爾哈酥有以道傍紫花獻者不得其名然蓓蕾蕤纒可愛詢之士人曰此長十八也高侍講松亭行紀載元葛邏祿迺賢塞上曲云雙鬟小女玉娟娟自捲檀簾出帳前忽見一枝長十八折來簪在帽簷邊則知其名舊矣但女飾無帽不審簪在者自簪也耶抑簪人也姑記此俟解者豫念塞外苦寒女飾有似帽簷遮在額黃名昭君套者多貂騷海龍之屬作帕裹扎繫以錦繡繡繪墜以金銀玉璫近南方人多效之云折來簪在帽簷邊似自簪為是

觀我生賦哀江南賦

哀江南賦情詞悱惻子山獨步一時然云宰相以干戈為兒戲縉紳以清談為廟略全是責人而致命遂志之語一無流露讀顏子推觀我生賦其哀音苦節與子山同遭侯景之難而其詞則曰小臣耻其獨死實有愧於胡顏較信頗為惻款按北齊書之推有家訓二十篇而史未掇拾其大概何耶

息媯未言

杜牧過息夫人廟咏云細腰宮裏露粧新脉脉無言幾度春至竟息亡緣底事可憐金谷墜樓人極得詩人諷刺意理十六國

春秋劉曜后卽晉惠帝后也曜問曰吾何如司馬家兒羊后曰
陛下闢基之聖主彼亡國之暗夫何可並言彼貴為帝王有一
婦一子及身三耳曾不能庇之使妻子辱於庶人之手妾於爾
時實不欲生何圖復有今日妾生於高門意謂世間男子皆然
自奉巾櫛以來始知天下自有丈夫其蕩薄更出息媯下矣

王建遠將歸篇

但令在家相對貧莫向天涯金繞身語意蘊蕃勝於出門若有
歸死處猛虎當嚙向前去其田家行空城雀簇蠶詞諸什征煩
賦重氣象如畫張籍征婦怨寄衣曲別離曲各製非不入情而
微嫌徑直惟節婦吟一篇為獨絕耳

拘幽操將歸操龜山操

目搆搆兮其疑其盲凡人憂迫於中則目眩於外王風彼黍離
離彼稷之苗曰其疑曰其盲卽周大夫過故宮意也將歸操涉
其淺兮石齧我足乘其深兮龍入我舟猶詩人深則厲淺則揭
也龜山操周公有鬼兮嗟余歸輔平日夢見周公神懷不能再
得此吾衰所以興嘆

水怪

河患自古不息相傳河要決口大潘前見綠色水鳥數隻浮沉
飛舞蟻穴滲漏未幾漫溢槐西雜誌載衛河有棒椎魚集於一
處以首觸岸如萬杵齊築則決在頃刻間豈大禹治河支祁之
怪尚未絕耶槐西雜誌
紀財撰

倫紀異稱

北齊書南陽三綽兄弟皆呼父為兄兄嫡母為家家乳母為姊姊婦為妹妹又三國志劉虞傳別傳誠弟偉曰吾觀魏諷不修德行而專以鳩合為務華而不實此直攪世沽名者也卿其慎之稱弟為卿亦所創聞至禮記曾子問篇有曰昏禮既納幣有吉日婿之父母死已葬婿之伯父致命女氏曰某之子有父母之喪不得嗣為兄弟名夫婦為兄弟者據未成婚言也

賦咏詩要識避忌

灌畦暇語楊惲以列卿被放因與會宗書其中有秦聲之詩詩曰田彼南山蕪穢不治種豆一畝落而為箕人生行樂爾須富貴何時是時有與惲不相能者謗其語以上聞孝宣帝大怒下之吏當以大臣怨誹罪及三族沈約以佐命勳位冠梁朝晚年

諸進用事者忌其固位取約所為陸葱詩乘間以白武帝帝意已不能堪未幾得道士赤章事遂大發怒約以憂死其詩曰野馬不可騎兔絲詎宜織爾非萍與蒿豈供麀鹿食臨溪詩話慶歷中李淑罷翰林學士知鄭州會奉祠柴陵作詩三絕其恭帝詩最涉嫌忌曰弄楫牽車晚鼓催不知門外倒戈回荒墳斷壠逾三尺猶認房陵半伏來既為仇家陳述古挾其事以聞褫一職至和中阮逸為宮教授有宗室能詩多與逸唱和逸有句曰易立太山名難枯上林柳有言其事者朝廷方治之會逸復以請求賄事因廢斥之此數子者大則身首之憂小亦斥逐之辱余謂士大夫不幸而遭擯棄只宜反躬自贖即欲抒寫性情亦當思小雅怨誹之義

西周東周

平王東遷之後所謂西周者豐鎬也東周者東都也威烈王以後所謂西周者河南也東周者洛陽也

副都統亦有漢官

沿海聞見錄同安陳倫炯誌云先公藉神策廟算應時戡定敘功授職至碣石鎮總兵擢廣東副都統

王驩為輔行

秦策王令向壽輔行注輔猶副

性情

中庸天命之謂性孔疏引賀瑒云性之與情猶波之與水靜時是水動則是波靜則是性動則是情數語最精此卽樂記人生而靜天之性也感于物而動性之欲也意

南方之強與北方之強與

疏云言南北不言東西者鄭冲云是必南北互舉蓋與東西族同故不言也不知言風俗學問者祇舉南北不舉東西如南學北學南人多共華北人多精實是也而必互舉言之鑿矣

鼻煙壺

鼻煙起干 本朝其始止行八旗并士大夫近日販夫牧豎無不握此壺則水晶羊脂瑪瑙翡翠茄瓢磁石等質而蓋則珊瑚珍珠猫眼無不鏤奇錯采最行者燒料套紅以藕粉底為上久貯不乾者名老皮價甚鄭重

教官學政

大司徒教官之屬大司樂掌成鈞之法以治建國之學政今之儒學學臺由來已久矣

寺

今時官署稱寺如大理寺光祿寺太常寺太僕寺鴻臚寺等皆稱寺考周禮墓大夫居其中之室以守之先鄭曰居其中之室有官寺在墓中賈疏寺則室也故官署亦得以寺稱

淇湖水勢

道光十二年七月黃岡寺志椿水至二丈一尺為從來所未有河臣張井作馬鞍掃以禦之今秋九月初旬較上年又長一尺居民驚怕紛紛四走幸西風不作漸次平穩真神助也

春秋時司徒司馬多賤官

孟獻子之喪司徒旅歸四布注司徒孟孫氏家臣官名故少儀適公卿之喪則曰聽役於司徒是叔孫氏之司馬驪戾司馬叔孫氏之家臣官名故襄十二年以公鉏為馬正注云馬政家司馬

晉特重元帥

成六年晉欒書救鄭日子為大政注中軍元帥又日子之佐十一人夫晉自成三年作六軍故將中軍以外尚有十一人本自分行而皆統於中軍故目之曰佐知當日大權不假手于偏裨也

君子辭也

桓十八年公羊讐在外則何以書葬君子辭也此四字深得春秋意孔檢討通義云親殺君者彭生也時魯人請于齊而誅彭

生臣子之心亦少紓矣故以恕辭葬之云云洵如孔言則是成濟之污膏斧足以代罪于司馬氏而趙宣之不討賊可以不書于太史氏也豈通論哉

物有終始

終居始之先邵子曰无極之前陰含陽也

鴉片

此煙出於外洋閩粵諸省多有服吃者至近年各省徧行卽內地亦出溫台諸郡栽種罌粟取漿搗土熬之藉以漁利外夷者為大土內地者為小土其價小土賤而大土貴縱欲之輩恃其頃刻足以提攝精神故取值甚昂久服上引如今日午服次日午時萬不能緩稍遲便筋弛脈懈如同癱痿最足短促年壽俾

晝作夜竟同廢人故厲禁甚嚴雲南知縣許士傑失察取利因以落職

裁汰各省冗員

道光十二年六月直督琦奏冗員奉

上諭裁汰自通判以下共二十餘員廣東奏裁廉州府同知肇慶府通判高廉兩州府司獄南海番禺隅縣兩河泊所兩大使長寧始興兩縣訓導着俱裁汰八月十二江南省裁汰江蘇華亭縣主簿一缺所司水利改歸縣丞兼管鎮江府照磨一缺所司稽查渡江救生船事着改歸鎮江府知府兼管金壇縣湖溪巡檢無巡防之實江寧府照磨一缺無專管事宜揚州府檢校一缺無專司之事所有稽查邦溝閘座督夫啓閉事宜着改歸揚

州府經歷兼管十二年八月陝甘裁丞倅等官五員九月初四
江西撫臣周之琦奏裁建昌府水利通判一缺九江府督糧通
判一缺又佐雜撫州袁州九江三府共設經歷照磨今照磨俱
着裁汰均歸經歷又武寧縣高坪司巡檢新淦縣橫山司巡檢
德興縣白河司巡檢該三縣俱屬中缺均原設縣丞典史各一
員足敷差遣巡輯着卽裁汰九月十八奉

上諭雲貴督臣阮元酌裁知縣佐雜等官並改設分防縣丞貴
州磐石司巡檢着卽裁汰錦屏縣幅幘偏小所有知縣典史訓
導俱着裁汰所有地丁錢糧就近改貴開泰縣管理惟錦屏地
方民苗雜處未便乏員着改設錦屏縣丞一員仍歸開泰縣管
轄九月初三奉

上諭南河督臣張井奏裁丹徒縣丞儀徵清江閘閘官如臯縣
縣丞興化縣縣丞着照所議阮元等奏裁雲南江靖府同知劍
州所屬彌沙井鹽大使并曲靖永昌大理三府司獄順寧府知
事均着裁汰浙撫富呢揚阿奏裁紹興府北塘通判歸併南塘
通判兼理衢州府糧捕通判杭州府屬之城北務錢塘縣屬之
西溪務俱着裁汰湖州紹興二府司獄寧波府屬象山趙輿巡
檢嚴州府建德縣縣丞均一併裁汰八月十五鍾祥奏裁蘆東
滄州運判一缺歸并天津運同膠萊運判一缺歸併濱樂運同
又裁興國場大使一缺歸豐財場兼管又登寧場大使一缺信
陽場大使一缺並着鄰境壽樂場兼管其運判發于各省大使
歸于本屬遇有缺出另補湖南撫臣吳榮光奏裁岳州同知一

缺永順常德兩府通判二缺柳州道州州判二缺巡檢七缺訓
導六缺十三年福建撫臣魏元烺奏裁縣丞二缺司獄六缺巡
檢九缺俱着裁汰

秋陰雜記一卷終

山陰門人張維椽校



國家圖書館, NATIONAL CENTRAL LIBRARY, TAIWAN, R.O.C.